



## Concept pella promoziun da singulas personas e fuormaziuns

### 1. Intent

Il cumün da Scuol vül sustegner e promover singulas personas sül chomp da cultura e sport, quai per render amo plü cuntshaintas ed attractivas singulas activitats sportivas o culturalas e per promover la qualità dal lö da viver.

### 2. Princip

Sco instituziun publica arcugnuoscha il cumün da Scuol la grond'importanza dal sport e da la cultura. La varietà e qualità da la sporta sün quists chomps sun importantischmas per la qualità da viver sco eir per l'attractività, la reputaziun e la prosperità dal cumün. Per cha las abitantas e'ls abitants profitan d'üna vasta sporta pel temp liber s'ingascha il cumün da Scuol in plüssas manieras per la promoziun dal sport e da la cultura. El investischa minch'on consequaintamaing bundant 2 milliuns francs

- pella promoziun da societats in fuorma da contribuziuns annualas
- pel mantegniment da l'infrastructura – loipas, halla da glatsch, Bogn, localitats per prouvas e concerts, vias e sendas, trafic public
- per scolaziuns/trenamaints (classas da sport, OJ etc.)
- per occurrenz (contribuziuns unicas ed annualas ad organisaturas ed organisaturs)
- pella reclama turistica (contrat da basa culla TESSVM)
- per contrats da partenadi cun singuls ambaschadurs (in collavuraziun cun organizaziuns turisticas sco la TESSVM, il Bogn Engiadina o las Pendericas Scuol)

Sper quist sustegn existent dess pussibilitar ün model simpel ed effectiv il sustegn e la promoziun da personas singulas cun grond talent o success extraordinaris in tshertas disciplinas sportivas o culturalas.

### 3. Rom finanziel

Per sustgnair e promover singuls exponents prevezza il cumün ün import maximal da 30 000 francs l'on. Scha l'import nu vain dovrà cumplettamaing scrouda il rest a la fin da l'on. Dumondas chi surpassan l'import sun da spostar ad ün oter on o da trattar separadamaing tanter la cumischiun e la suprastanza.

### 4. Validità ed exclusiun

La promoziun tenor quist concept es previsa explicitamaing per singulas personas e dess güdar a quellas da progredir in lur actività grazcha al sustegn finanziel in fuorma d'ün import unic. Quai vala correspudentamaing eir per singulas fuormaziuns (activitats da gruppas, sport in squodras) chi accumulishan ils criteris.

Il concept exclude

- partenadis da sponsoring sur plüssas intrapraisas e sur plüs ons → per tals es da drizzar üna dumonda separada al cumün
- promoziun da singulas occurrenz ed accziuns → preventiv e reglamaint separà
- imports singuls ed annuals a societats e clubs → preventiv e reglamaint separà

## **5. Cumischiun pella promoziun da talents**

Il cumün da Scuol instituischa üna cumischiun chi tratta regularmaing las singulas dumondas.

### **5.1 Cumposiziun**

La cumischiun as cumpuona da quatter persunas chi rapreschaintan ils trais levels da la supranza, la direcziun e l'operativa:

- promotur/-a da l'economia e dal turissem (persuna da contact)
- chanzlist/-a
- supstant/-a dal decasteri turissem e sport
- supstant/-a dal decasteri scoulas, cultura e social

### **5.2 Sezzüdas**

La cumischiun as raduna almain trais jadas l'on. Ultra da quai pon gnir clamadas aint sezzüdas ad hoc.

## **6. Criteris per ün sustegn**

Per garantir l'effet giavüschà, ma eir in vista ad üna tschertà lealtà valan divers criteris pel scumpart dals imports da promoziun:

### **6.1 Criteris impegnativs**

- Ils petents ston s'identifichar cul cumün da Scuol e sia sporta.
- Las persunas sustgnüdas ston abitar a Scuol.
- La disciplina e la persuna/fuormaziun promovüda ston avair üna reputaziun surregionala.
- Il cumün da Scuol o almain la regiun ston spordscher e promover/sustgnair l'actività dal petent (vair punct 2).
- Ils petents ston esser prontos da render visibel l'ingaschamaint dal cumün sco sponsor.
- Il sustegn nu das-ch'esser in contradicziun cun böts strategics o directives dal cumün.
- La dumonda sto gnir inoltrada in scrit cul formular correspondent.

### **6.2 Ulteriurs criteris ed aspets (da valütar tras la cumischiun):**

- posiziun singulara dals petents sco eir rangaziuns, success e schanzas sün nivel naziunal ed internaziunal
- effet da reclama e relevanza (economica, culturala e/o turistica) da l'actività e da la persuna/squadra promovüda
- bsögn da sustegn/promoziun o manguel finanziel
- età dals petents

- büdschet cumünal
- ingaschamaints passats/sustegn precedaint dal cumün

Persunas chi han fingià ün contrat da profi e vegnan pajadas correspudentamaing nun han ingün dret da surgnir il sustegn dal cumün.

## 7. Categorias, imports e dürada

La cumischiun decida a man dals criteris manzunats survart davart l'import da promoziun. Ella classifiescha l'ingaschamaint tenor las seguaintas categorias:

- |                     |                        |              |                              |
|---------------------|------------------------|--------------|------------------------------|
| ▪ Cat. A «Lischana» | talents chantunals     | 500 francs   | ca. 75 % da las dumondas*    |
| ▪ Cat. B «Pisoc»    | talents naziunals      | 2 000 francs | max. 20 % da las dumondas*   |
| ▪ Cat. C «Buin»     | talents internaziunals | 5 000 francs | max. 5-10 % da las dumondas* |

Cun quai chi's tratta dad imports unics valan quists imports per üna dürada da duos ons. Quai vuol dir cha persunas/fuormaziuns sustgnüdas das-chan repeter lur dumonda il plü bod 24 mais davo l'ultim sustegn.

\* *La cumischiun respunsabla pel scumpart pissera, cha'l nomer da las dumondas acceptadas in mincha categoria stetta in relaziun cul import.*

## 8. Fuorma ufficiala dal sustegn

Ün contrat simpel regla ils seguaints puncts dal sustegn:

- prestaziun dal cumün sco promotur
- cuntraprestaziun da la persuna o fuormaziun promovüda
- entrada in vigur e dürada dal contrat (import unic, na repetitiv)

## 9. Transparenza

Il proceder cumplet sto gnir documentà a partir da la dumonda dals petents fin pro la resposta da la cumischiun.

## 10. Entrada in vigur

Quist manual es gnü fat bun da la suprastanza als 23 november 2020 ed aintra in vigur als 1. schner 2021

Scuol, ils 25 november 2020

Christian Fanzun, capo

Andri Florineth, chanzlist